



- EDITORIAL • RÂL VÊNGTU
- » THUTHLUNG HLUI BU KIM HRILHFIAHNA TLANGZARH A NI
- » SYNOD BOOKROOM BRANCH THAR PAHNIH HAWN A NI
- » SYNOD RESOURCE CENTRE HAWN A NI

RNI 68092/83 Regn. No. N.E. 1024
From
 Synod Literature & Publication Board
 Synod Office, Aizawl - 796 001
 Mizoram. Phone: 0389-2324590

SYNOD *Newsletter*

Volume XXXVI

No. 9 & 10

E-mail: synodnews@gmail.com

SEPTEMBER & OCTOBER 2021

LÂWRKHAWM

SYNOD OFFICE KAI HUN

Mizoram sawrkârin October ni 3–16, 2021 chhunga Covid-19 inkhuahkhirhna a tihchhuah tharah kohhran office-te kal pângngaia kal a phal tâk avângin, October ni 4 aţangin thu leh awm hma chuan Synod Office kai hun chu dâr 10 a.m. aţanga dâr 4 p.m. a ni ang.

SYNOD CALENDAR TIDANGLAM

Synod 2020 Gen. 18 bawhzuiin hetiang hian Synod Calendar tidanglam a ni:

1. Synod Executive Committee (SEC) ţhut hun tûr December ni 1&2, 2021 chu November ni 24&25, 2021-ah sawn a ni a, Synod Inkhâwmpui hun chhûngah a tel tawh lo vang.
2. Kumin Synod Inkhâwmpui hun chu December ni 3–12 a ni ang.

DAMDAWI IN TAN THAWHLAWM

Synod 2020 Gen. 10-na, "Synod Hospital-a leiba tihzângkhai nân dânzawhkim tinin ₹20/- ţheuh thawh ni rawh se," tih bawhzuiin October ni 1, 2021 khân Upa Lalrinmuana, Synod Secretary chuan tualchhûng kohhran tin hnênah he thawhlâwm hi kum 2021–2022 chhûnga pe tûrin hriattîrna leh genna a chhuah.

PATHIAN THU A ZIR THEIH

Aizawl Theological College, Dur-tlângah kum 2022–2023 chhûng atân B.D., D.C.P.C., B.D. (Hindi), M.Th. leh D.Th.-te a zir theih a. Hre Chiang duh chuan ATC Principal zawh chian theih a ni.

THUTHLUNG HLUI BU KIM HRILHFIAHNA TLANGZARH A NI

September ni 16, 2021 (Ningani) khan Thuthung Hlui bu kim hrilhfi ahna chu J.M. Lloyd Hall, Synod Office, Aizâwlah Rev. Dr. C. Lalhlîra, Synod Moderator-in a tlangzarh. Tlangzarh inkhâwm hi Rev. B. Sângthanga, Executive Secretary i/c SL&PB-in a kaihruai a. Rev. Dr. C. Chawngmingliana, SL&PB Editor-in lehkhabu tlangzarh chanchin leh buatsaih a nih dân a sawi a. Pu Zohmingliana Colney, Jt. Editor, SL&PB-in hrilhfi ahna ziaktute hnenah lehkhabu a hlan a; Rev. Lianhmingthanga Sailo, Sr. Executive Secretary-in malsâwmnain inkhâwm a ţin a ni.

Mizorama kohhran mamawh lehkhabu tihchhuah tawh zîngah, Puitling Sunday School zir atâna buatsaih ţhin tih loh chu Bible bu mal hrilhfi ahna hi a hranpa taka khawih a ni ngai lo va. Kan rama kohhran hmasâwn chak dân thlîrin, a hranpa ngata Bible hrilhfi ahna buatsaih hi Synod Publication Board (Tunah Synod Literature & Publication Board) chuan ţul hlein a hria a. Thil pui tham deuh a nih avângin he rilru hi Synod Literature Committee-ah a thlen a. Literature Committee pawhin kohhranho mamawh ngei nia hriain, a tihpuitlin hna chu Synod Publication Board bawhzui atân a pe ta a. Chu chu kum 1987 tâwp lam kha a ni.

Kum 1988 chhûng khân Publication Board chuan chu hna kalpui dân tûr chu ngaihtuahin, Gospel Centenary denchhena hna pui pakhat atân a ruat a. Mizo Theological Literature Committee (MTLC)-in Thuthlung Thar Hrilhfi ahna a lo buatsaih mêk bawk avângin, thawh khatna atân Thuthlung Hlui bu hrilhfi ahna buatsaih pawt a rêl a, a bîka mawh phur tûrin Editorial Board a ruat ngâl bawk.

Editorial Board chuan a ziah dân tûr leh thil ţul dangte ngaihtuahin, ruahmannate a siam a. Hrilhfi ahna rinchan ber atân Interpreter's Bible Commentary (Vols. 12) a thlang a, bu tê deuh ţhenkhat fin khâwmin bu hrang (volume) 25-a siam tûrin a duang a, a ziaktu tûrte pawh a rawt nghal vek bawk. Ruahmanna chu Publication Board-in a pawm hnuah, kum 1989 July thla aţang khân ziaktuten hna an ţan ta a. Mizorama Chanchin Ţha Thlen kum 100-na denchhena hna pui pakhat (Gospel Centenary Project) a nih angin

Gospel Centenary lawm kum, 1994 khân chhuak kim vek hman tûra ruahman a ni a. Amaherawhchu, a ziaktute hi mahni hnaa mi ţul tak vek an nih avângin hun bi tukah a chhuak kim thei ta lo.

Ziak zawh hmasak apiang en fela chhut zêl a ni a. Hrilhfi ahna bu kim kan neih hun chhûng hi a rei hle a, a chhuak hmasa ber leh hnuhung ber inkârah hian kum 30 zên zâwn a tla a, SL&PB Editor pawh mi 5 an inthlâk hman a, anmahni hun ţheuhvah theihtâwp chhuaha an bawhzui avângin Mizo Kristiante tana lehkhabu ro tling kan lo nei thei ta a ni.

A bu chhuak hmasa lam kha Mizorama computer kan hman ve hma a nih avângin, computer-ah chhut luh leh vek a ni a. Bible thu chhut luh vek a ngai bawk a. Chutianga chhut luh fel a nih hnuah uluk taka en mâm leh a ni a. SL&PB-a thawktuten an hahpui hle.

He Thuthlung Hlui bu kim hrilhfi ahna hi Pathian thu thiam mi 25-in an ziah a ni a. Bu li-ah siam niin, a bu kim hian ₹2,000/- man a ni a, Synod Bookroom dâwr hrang hrangah lei theih a ni.



Synod Moderator-in a tlangzarh

SYNOD Newsletter

EDITORIAL STAFF

Rev. Dr. C. Chawngmingliana

Rev. B. Sângthanga

Upa H. Ronghâka

Upa C. Thanga

Editorial

TI THEIA I INRIN CHUAN

I THEI

"Tumna a awm chuan kawng a awm," tih thufing lâw tak hi kan hre theuh âwm e. Pathian hian mihringah hian mita hmuh theih si loh, 'theihna' (potential) ropui tak a dah a. Chumi hmang thiam apiangte chu mi vânei, mi hlawhtling an ni thîn.

Chinese insual (Kung Fu) thiam tak mai Bruce Lee kha a thil tum tawhah chuan hlawhtlin tum tlat mai, a ber kai tum tlat mi a ni a. Martial arts-ah thiam ber nih tum, hneh loh neih tum miah lo a ni a. A hneh loh pawh 'ka hneh thei ang' ti tlat mi a nih avângin a hneh leh nge nge thîn. A hun lai na na chuan martial arts thiam ber leh hmingthang ber a ni thei.

Mizo thufingah pawh, "Tum a sân chuan tlâkna pawh a sâng," tih a nih kha. Hlawhtling tur chuan tih i tum kha khêk khawtlai lovin tûnah ti nghâl zêl rawh. 'Nakin' tih hi hlawhchhamna kailâwn hmasa a ni a, Setana hmanraw tha tak a ni bawh. Tûn hun tha bawhpelhtu chuan hlawhtlinna a hloh a ni.

Ni tin (every day) hian hlawhtlin theihna remchâng a paipâwn reng a, a hmang thiam thiamin an hlâwkpuï thîn. A hmang thiam lo leh hmang peih lo tân erawh chuan 'chhâm tui pai lo ang' maia tangkaina nei lo a ni lawi si.

Hlawhtling tak tak tur chuan hlawhtlinpuï atâna duh chauhah insâwr bing tûr. Sâp thufing chuan, "Jack of all trades, master of none," a ti a; "Thil tih lâwr duat hian eng mah thiam theih a ni tak tak lo, hlawhchhamna mai a ni e," tihna a ni ber awm e. Pathianin keimahniah hian thil nasa tak tih theihna a dah a. Amah nêk kan tan dun phawt chuan, 'ti theia kan inrin chuan kan ti thei zel ang'. Bible chuan, "Mihring tân tih rual loh hi Pathian nêk erawh chuan engkim tih theih a ni," tiin min hrilh.

SYNOD BOOKROOM BRANCH THAR PAHNIH HAWN A NI

Tûn hnaiah Synod Bookroom Branch thar pahnih – Zêrabâwk North Branch leh Siaha Branch-te hawn a ni. Ni 25.9.2021 (Inrinni) chhûn dâr 12 khân Synod Bookroom, Zêrabâwk North Branch chu Rev. Dr. C. Lalhlîra, Synod Moderator-in a hawng a. Bookroom Branch thar hawnna inkhâwm hi Upa H. Ronghâka, General Manager, PRESCOM Department-in kaihruiin Pastor K. Lalthlengliana, Zêrabâwk North Bialtu Pastor-in hunserh a hmang a; Rev. B. Sângthanga, Executive Secretary i/c PRESCOM Dept.-in Branch ni tûra buatsaih a nih dân a sawi.



Moderator-in Zêrabâwk North Branch a hawng

Synod Bookroom, Zêrabâwk North Branch hi Synod Bookroom Branch 15-na niin Zêrabâwk North Kohhran Biak In hnuai, kawngpuï ânah hawn a ni a. A dung feet 39 leh a vâng feet 28-a zau a ni a. Stockroom feet 28-a sei leh feet 12-a zau a nei bawh.

PRESCOM Board-in kum hnih chung a buatsaih, Synod Bookroom, Siaha Branch Building thar, New Siaha Bazar bula mi pawh ni 9.10.2021 (Inrinni) zing dar 7 khan Rev. Dr. C. Lalhlîra, Synod Moderator-in a hawng bawh a.

Synod Bookroom, Siaha Branch building thar hi October 2020 thla tâwp khân buatsaih tan a ni a. Chhâwng 4 niin, kawngpuï ânah Showroom a awm. Showroom hi a dung feet 30 leh a vâng feet 27-a zau a ni. Hei bâkah hian stockroom leh thawktu chênna a nei bawh.

Synod Bookroom, Siaha Branch Building thar hawnna inkhâwm hi Rev. David Lalrinmawia Sailo, Siaha Bialtu Pastor-in kaihruiin, Synod Bookroom, Siaha Branch Committee aiawhin report a pe a. Pu Lalniliana, Synod Bookroom Manager-in building sak dân a sawi bawh.

Heti hian, Synod Bookroom chuan Branch 16 leh Distributor 40 a nei ta a ni.



Moderator-in Siaha Branch a hawng



SYNOD BOOKROOM, SIAHA BRANCH CHUNG LAM



SYNOD BOOKROOM: ZÊRABÂWK NORTH BRANCH

Râl Vêngtu

Râl Vêngtu chu ngaihtuah ding hmêl tak hian a lo ding vang vang a. Mite chuan, "Râl Vêngtu, vei nei i va ang ve!" an ti a. Râl Vêngtu chuan, "Nau vei takin ka vei che u maw le!" a ti a.

Mite chuan, "Mi awm tha hle hle lo vei leh rîngawt thin mai chuh!" an ti a. Râl Vêngtu chuan, "Ben harh harho, mahni nihna pawh hre thei lo khawpa ngawngte u, ka han hrilh râwt teh ang che u.

"Harh rawh u. Ka ti leh pek thin ang, harh rawh u. Pâwn lam râl chu ka vêng hneh e. Cancer natna aia hlauhawm, mumal neih lohna hri chhia in vei a nih hi. Khawiah awm tha hle hle va ni suh che u!

"In Dân buin eng nge a sawi? Ding nghet tûr leh tiam chin lam pan tûrin a ti che u a ni lo'm ni? Chaw pângngai ngaithei lova chaw chi thar hlîr ei tum te, tûk tina paudar rawng chi hrang hrang hnawih thlâk thînte hi mi nghet leh mumal in ti dâwn em ni? Kohhran leh khawtlângah pawh tih dân mumal leh nghet pawh in neih theih tawh loh hi. In tih dân in ning zung zung a, tih dân thar in chher chhuak zung zung a. Chuti chung chuan lungawina tak tak in nei thei chuang lo. Tih dân thar dang in dap reng mai chu a nih hi. Hetiang hi awm tha hle hle kan ti thei dawn em ni?

"Tûk tina bari thenna thlâk thînte hi mi eng ang nge an nih le? Chhûra ko thlâk ang leka mahni hnu lama lêt leh vak vak thin hi tiam chin lam pan an ni thei ang maw?

"Nuin a pasal zin hlânin a sam lo herh kir se, a pasalin a rawn hai mai dawn lo'm ni? In lal a lo kal hunah 'Ka hre lo a che u' a tih loh nân in awm dân timumal rawh u. Leplêh aiin nungchang mawi a duhawm zâwk a. Awm dân thlâk sek aiin mi nghet an zahawm zâwk. Muñih thing hi a thang duang hle a; mahse, thang mawh zawk vawngthla thing hi a tlo fe zâwk asin! Harh ula, let but but lovin Kohhran leh khawtlâng ze nghet nei rawh u," a ti a.

SYNOD HOSPITAL, DURTLANG THILPEK DAWNTE (August 2021)

I. CHARITY FUND

1. Lungdai Kohhran	₹ 2,000/-
2. Lungdai Hmar Veng Kohhran	₹ 1,000/-
3. Chhiahtlang Kawn Veng Bial Kohhran Hmeichhia	₹ 3,000/-
4. Lalthanfeli, Staff Nurse, Synod Hospital	₹ 1,920/-
5. N. Mualcheng Kohhran	₹ 10,000/-
6. Vanlal Partlana & Family, Seling	₹ 10,000/-
7. Champhai Kahrawt Veng Bial Kohhran Hmeichhia	₹ 10,000/-
8. Pi Zahmingthangi, Republic Vengthlang	₹ 5,000/-
9. Pi Lalremi m/o R.C. Lalrengpuii, Zemabawk North	₹ 2,500/-
10. Seling Presbyterian Kohhran	₹ 20,000/-
11. Sumsuih Bial Kohhran Hmeichhia	₹ 4,000/-
Belh khawm	₹ 69,420/-

II. GRACE HOME TANA PETE

1. Dinthar Bial LAD, Aizawl	₹ 9,000/-
-----------------------------	-----------

III. THISEN PETUTE

	Unit zat
1. K.T.P., Tuikual Branch	54
2. K.T.P., Sihphir Venglai Branch	17
3. K.T.P., Ramhlun Branch	48
4. Mizoram Gurkha Youth Association	43
5. K.T.P., Ramhlun Vengchhak Branch	25
6. K.T.P., Bethlehem North Branch	26

IV. THIL DANG PETUTE

1. West Phaileng Chhim Veng Kohhran – Damlo ei tur chawhmeh tam tak.
2. Dr. Samuel Sailo, Pediatrician, Synod Hospital – Naupang Ward tan Plustic Arm Chair pasarih (7).

3. KTP, Tlabung Zodin Bial – Hmunphiah tam tak.
4. KTP, Hmuntha Bial – I.V. Stand 10.
5. Upa Lalhupzauva te nupa, Lungleng-I – NCB Bathroom-a hman atan Pastic Rack tha tak 10.

V. PAWISA DAWN ZAWNG ZAWNG – ₹78,420/-

TIHDIKNA : June thla thilpekah Upa R.L. Chhuanawma & family, New Serchhip chu a hming leh Grace Home tana an pek ₹5,000/- chu ₹3,000/- tiin chhut sual palh a ni a, an chungah ngaihdam kan dil e. Chhut hmaih leh tihsual dang neih palh theih a ni a, inthlahrung lova rawn sawi zel turin kan ngen bawk a che u.

NGENNA : Hospital Consultative Body Meeting (CBM) chuan hospital mamawh Kohhranhoten min pek thinah lawm thu a sawi a; chutih rual chuan heng hi lo chhinch-hiahsak turin Kohhranho a ngen a ni:-

1. Thilpekah kan tih theih zâwng/tâwk a awm theuh ang a. Chutih laiin, hospital mamawh kan pek theih nan hotute zawh hmasak ni thei se a lawmawm hle ang.
2. Thuthlengsei (Bench) min pekte hi a thangkaiin a lawmawm hle mai. A in chen loh hlawm avangin hmanna leh dah khawmna lamah a buaithlak deuh thin a. A sei zâwng ft. 6 leh a hlai zâwng ft. 1 ni thei hram se a lawmawm khawp ang.

Khawngaihna leh duhsaknaa thilpek min petu zâwng zâwng hnenah Lalpa Isua Krista hmingin lawm thu kan sawi takmeuh va. Heng in thilpek kan dawnte hian damlo awm man harsate thlamuang taka a awmtir bakah hospital mamawh tam tak min puhruksak thin bawk a ni.

Sd/-
(REV. R. RAMDINMAWIA)
Chaplain, Synod Hospital, Durtlang

PRESBYTERY INKHAWMPUI HMANG

October ni 7-10, 2021 chhûng khân Presbytery Inkhawmpui hman a ni a. Kuminah hian hripui lêng avângin zân lamah Vântlâng Pathian Biak Inkhawm awm lovin chhun lamah chauh, sawrkar inkaihhruaina zâwm chungin fimkhur taka hun hman a ni a, Rorel Palai pawh a tlem thei ang ber inruat a ni. Presbytery inkhawmpui hi hripui leng avangin a hun pangngaia hmang thei lo an awm bawk. Presbytery hi Mizoram Synod hnuaiah 41 – Mizoram chungah 40 leh Mizoram pawnah 1 a awm. Hetiang hian Synod Puipaten Presbytery Inkhawmpui an hmanpui:

Rev. Dr. C. Lalhlira, Moderator	– Chhimitawp Presbytery
Upa Lalrinmuana, Synod Secretary (Sr.)	– Tlawng Presbytery
Rev. Z.D. Lalhmachhuana, Synod Secretary (Jr.)	– Aizawl Bethel Presbytery
Rev. Lianhmingthanga Sailo, Sr. Executive Secretary	– Aizawl Chhim Presbytery
Rev. B. Sangthanga, Executive Secretary	– Tuivai Presbytery
Rev. K. Lalrinmawia, Executive Secretary	– Tuirini Presbytery
Rev. Lalramliana Pachau, Finance Officer	– Sakawrhmutuai Presbytery
Upa Lalthianghlina, Statistician	– Aizawl Central Presbytery

KTP CHAW NGHEIIN TAWNGTAI RUAL

Kristian Thalai Pawl (KTP) Rorêl Inkhawm wawi 9-na General 6-na, "Ram pum huap chaw ngheia tawngtai rual neih ni rawh se," tih chu Central KTP Committee ruahman angin October ni 3, 2021 (Pathianni) khân hman a ni a. Tawngtai thupui hi hlâwm li – Hripui lêng avânga harsatna tâwkte tân, Ram hruaitute tân, Rawngbâwtute tân leh Ruihhlo ngaite tân titea then a ni. Ram pum huap chaw nghei tawngtai rual hi Branch tinin an remchan dan angin an hmang a: Biak Inah kal khâwma hun hmang an awm a, mahni awmhmunah hmang an awm bawk.

CIRCULAR NO. 1 OF 2021

(Memo No. MS/STC-5/2021/3 of date 6.9.2021)

Covid-19 hripui lêng avângin sawrkârin inkaihhruaina (Lockdown) thla tam tak a kalpui a. Hetiang hi a nih avângin dâwr pawh hawn mumal theih a nih loh avângin, Synod OM 17:20 of September 2&3, 2021 rêl angin, Synod dâwr luahute chu thla hnih chhûng dâwr luah man âwltir tûr a ni e.



(REV. LIANHMINGTHANGA SAILO)
Senior Executive Secretary i/c Trust

ADVERTISEMENT

Mizoram Presbyterian Kohhran Hmeichhiate enkawl Women Centre, Phunchawngah kum 2022 chhông atân puanthui leh puantah zir dilna hawn a ni leh ta a. Presbyterian Kohhran dân chhônga awm tân dil theih a ni. Puanthui zir tûr mi 40 leh Puantah zir tûr Batch tin atân mi 10 zêl lâk tûr a ni ang. Puantah zirna hi Batch 3 neih a ni ang (Jan–April, May–Aug. leh Sep.–Dec.). Dilna Form chu Bial tin Kohhran Hmeichhe Secretary hnênah emaw, Kohhran Hmeichhe Department, Synod Office-ah emaw lam theih a ni a. Dilna Form la chhuak remchâng lo tân pdf-a thawn chhuah hmang hian online pawhin dil theih a ni ang.

Dil theih hun chhông : Ni 18.11.2021
(Ningani) thleng
Interview : Ni 19.11. 2021
(Zirtâwpni) 10:00 a.m.
A hmun : Committee Room-I,
Synod Office
Zirna ãan hun : Ni 13.1.2022 (Ningani)
Dilna thawna tur : 9862306787
Ph. No. : 8731000964
9436198411

(REV. B. SÂNGTHANGA)

Executive Secretary i/c Kohhran Hmeichhia

HNA RUAK DIL THEIH

Mizoram Presbyterian Kohhran hnuaiah Mizoram Christian College (MCC)-a thawk tûrin a hnuai department târ lanahte hian Assistant Professor (Contract) hna a ruak a. UGC Norms 2018-in a sawi ang thiamna neite tân dil theih a ni ang. Diltu chu zûk leh hmuam leh ruih theih thila fihlîm an ni tûr a ni. Hna dilna form chu ni 12.10.2021 (Thawhlehi) ațangin Synod Office (Aizawl leh Lunglei)-ah lâk chhuah theih a ni ang. Dilna hi Synod Office, Aizâwlah theh luh tûr a ni a. Dilna form hi ₹20/- man a ni. Hna dilna form-ah hriat tur pawimawh tihlan a ni.

1. English : 1 post
2. Management : 2 post
3. Commerce : 1 post
Hlawh : ₹30,000/- fixed.
Dil theih hun chhông : Ni 9.11.2021
(Thawhlehi),
3:00 p.m. thleng
Interview : Ni 26.11.2021
(Zirtâwpni), 11:00 a.m.

(REV. LIANHMINGTHANGA SAILO)

Secretary, Synod Service Board

KOHHRAN PAVALAI PAWL
HRIATTIRNA

Kohhran Pavalai Pâwl report, Kohhran leh Bial report khai khâwmna bu, January–December 2020 chu peih fel tawh a ni a. Aizâwl khawpui chhông kohhrante chuan Revival Department Office, Synod Office, Mission Vêng, Aizâwlah lam tûr a ni a; Aizâwl pâwn lam erawh chu thawn chhuah tûra buatsaih a ni.

SYNOD RESOURCE CENTRE HAWN A NI

Central Service leh All India Service-a Mizote an luh tam theihna tûra mamawh lamna atâna Mizoram Synod-in Sikulpui, Sikulpuikâwn, Mission Vêng, Aizâwla a buatsaih 'Synod Resource Centre' (SRC) chu September ni 20, 2021 (Thawhțanni) chhôn dâr 12 khân Rev. Dr. C. Lalhlîra, Synod Moderator-in a hawng.

SRC hawna leh lekhabu tlângzarh inkhâwm hi Zirlai Viltu Committee Chairman Rev. K. Lalrinmawia'n a kaihruai a. Pu Lalvêna Hnamtein report pein, lekhabu siam palite thuken tlangpui Revd Chuauțuama'n a sawi a. Synod Moderator Rev. Dr. C. Lalhlîra'n hêng lekhabu pali hi a tlângzarh a ni.



Zirlai Viltu Committee hi Synod Executive Committee (SEC)-in kum 2018 Synod thu - All India Services leh Central Services-a Mizote kan tlin tam theih nan hmalak a rel bawhzuia kum 2019-a a din, kum 2020-a budget tlem neia hna thawk ãan a ni a. Covid-19 hripui kârah kumin 2021 April thla khân lekhabu pali an peih fel a. Hêng lekhabuthe hi Mizorama Mizo ãhalai, Competitive Exam beih tumte inbuatsaihna tur leh kawng kawhhmuh nan liau liauva siam a ni. Hêng bâkah hian Competitive Exam inbuatsaih nâna lekhabu ãha dang chah khâwm mêk a ni bawh.

SRC hi Sikulpui building, Sikulpui-kâwnah a awm chhunzawm rih dâwn a. Mizo ãhalai, All India Services leh Central Services (Group A&B)-a luh tumte inzirna hmun tûr a ni. He Centre-a inziak lutte chu Identity Card siamsak an ni ang. Centre hi chhôn lama mahni remchân hun huna hman tûr, sawrkâr pisa chawlh ni leh Inrinniahte pawh hawn ãhin tur a ni. SRC-ah hian Competitive Exam atâna lekhabu chi hrang hrang leh chanchinbute dah a ni dâwn a, zirlaite hman ãangkai tûrin internet leh photocopier chhawp a ni bawh. Mizorama chêng Mizo, Competitive exam inbuatsaih tûr apiang chu eng kohhran mi pawh ni se inziak luh theih vek a ni.

He Zirlai Viltu Committee-ah hian Synod Secretary (Sr.), Executive Secretary pathum, Pastor pension pahnih (Rev. Dr. H. Vanlalauva leh Revd Chuauțuama) leh Synod Education Board Secretary bakah Pu R.L. Rinawma, IRS (Rtd.); Pu C. Lalsâwta, IAS (Rtd.) leh Pu Benjamin-a, IDAS (Rtd.) te an tel a ni.



Zirlai Viltu Committee leh Synod department ãhenkhat hotute